



UKA 2019/135  
UKA 2019/165  
UKA 2019/166  
24/9-2019  
Justus Hansen

**Qamutit motorillit akileraarutaat pillugit Inatsisartut inatsisaata allangortinnissaa, imaalillugu ATV-it taakkunungalu assingusut qamutit motorillit nunakkoorutit mikinerit sisamanik amerlanerilluunniit as-sakaasullit ukiumut akileraarutaat 2.000 kronemut appartinnissaanik Naalakkersuisut peqquneqarnissaanik Inatsisartut aalajangiiffigisassaattut siunnersuut.**

(Inatsisartunut ilaasortaq Stine Egede, Inuit Ataqatigiit)  
(Siullermeerneqarnera)

**Uunga siunnersuut: Eqqussuinermit akitsuutit pillugit Inatsisartut inatsisaata allangortinneqarneranik Inatsisartut inatsisaat nr. xx, xx. xxx 2019-imeersoq. (Plug-in hybridbiilit akitsuutaat, biilinit innaallagissamik imaluunniit brintimik ingerlatilinnut akitsuummik akiliisussaanginneq kiisalu qamutit motorillit nunaannakkoorutit minnerusut akitsuutaannik atorunnaarsitsineq)**

(Partii Naleqqamit Inatsisartunut ilaasortat)  
(Siullermeerneqarnera)

**Uunga siunnersuut: Qamutit motorillit akileraarutaat pillugit Inatsisartut inatsisaata allangortinneqarneranik Inatsisartut inatsisaat nr. xx, xx. xxx 2019-imeersoq. (Qamutinit motorilinnut taamaallaat innaallagissamik brintimilluunniit ingerlatilinnut plug-in hybridbiilinullu akitsuut, qamutinit motorilinnut nunakkoorutinit mikinerit akitsuuteqartitsinginneq kiisalu akiliinissamat piffissaliussamik allanngineq)**

(Partii Naleqqamit Inatsisartunut ilaasortat)  
(Siullermeerneqarnera)

2019-imi upernaakkut ataatsimiinnermi qamuterallannut ATV-nullu akitsuutit peeqqullugit siunnersuuteqarsimavunga. Soorunami siunnersuut suli tapersorsorpara, ataatsimiititaliamilu suliarineqarnissaa inatsisartullu ataatsimiittarfiani aappasaanik sammineqarnissaa qilanaarivara. Siunnersuutima akuerineqarnissaa 2020-illu januaarip aallaqqaataatinnagu atuutilernissaa neriutingaara.

Tungaviummik Demokraatini isumaqarpugut qamutinit eqqaaneqartunut eqqussuinermit akitsuutit peerneqarnerat inuussutissarsiortunut inuinnarnullu iluaqutaassasoq. Ataasiakkaanut kiffaangissuseq annertusissaaq pissakinnerusunullu qamutinit taaneqartunik pisinissaq ajornanginnerulissalluni. Qularinngilarpullu ATV-nut qamuterallannullu eqqussuinermit akitsuutit peerneqarpata, inuussutissarsiortut namminersortut qamutinit eqqartorneqarnunik tuniniaasartunut ulluinnarnilu sulinermini atuisunut iluaqutaassasoq.



Tupaallaatigineqarnaviangilaq Demokraatini isumaqaratta nammineq siunnersuutigisimasarput tulluarnerummat. Tamatumuuna siunnersuut 135 ATV-it ukiumut akileraarutaat 2.000 kronemut appartinnissaanut tunngasoq tapersersinnaangilarput. Nammineerlutami siunnersuutigisimasarput akileraarutip piivinnissaanut tunngasoq piumaneruarput. Taamatut oqaaseqarluta immikkoortoq 135 itigartipparput.

Siunnersuutit 165 166-illu Partii Naleqqameersut samminnginnerani aallaqqaammut eqqaassavarput UKA 2018/197 UKA 2018/198-imillu siunnersuutaasimasunik saqqummiusseqqinnerummat. Tamanna imminermini ajunngilaq, eqqaamaqqunarporli aningaasaqarnermut akileraartarnermullu ataatsimiititaliap 197 198-imullu isumaliutissiissutimini erseqqarissarmagu, qamutitut motorilinnut innaallagissamik ingerlatilinnut plug-in hybridbiilinullu eqqussinermi akileraarutit akitsuutillu akerleralugit.

Taamani uparuaanerput ilalerlugu Demokraatinit sulii akerliunerput erseqqarissassavarput, matumuunalu eqqaqqilaassavarput.

Isumaqqangilagut plug-in hybridbiilinut qamutinullu motorilinnut innaallagissamik brintimilluunniit ingerlatilinnut akitsuuteqartitsinissaq pissusissamisoortoq, tassami innuttaqarmat akiliinissamut ilimasunnatik qamutit taamak ittunik pisisoqarsimammat. Innuttanik salloqittaaneruvoq.

Isumaqqangilaguttaaq plug-in hybridbiilinullu qamutinullu motorilinnut innaallagissamik brintimilluunniit ingerlatilinnut ingerlalluurtumik tuniniaaveqartoq. Isumarput malillugu tuniniaavik aatsaat aallartisaleruttorfimminiimmat aserornissaanut navianartorsiusaagut uani siunnersuutigineqartumi akitsuutilersuilissagutta.

Tassunga atatillugu eqqarsaatigisariaqarpoq plug-in hybridbiilinut qamutinullu motorilinnut innaallagissamik brintimilluunniit ingerlatilinnut avatagiisinut qamutit benzinatortunik diesel-itortunillu pitsaanerummata. Nunarput avammut eqqiluutsut avatagiisinullu pingaartitsisut ussassaarutingerusupparput – taamaaliussangilagulli avatagiisimut qamutit motorilinnut mingutsitsinngittunik pissarsinierneq ajornarnerulersikkutsigu.

Taamatut oqaaseqareerluta isumaqarpugut ajornartorsiuutaasoq inuit ilaasa plug-in hybridbiilitik biilitut naliginnaartut atortarmatigit benzin-naannarmik ingerlateqartarlutik. Tuniniaaneq ajoqusernaveersaarlugit qamutit motorilinnut taamaattut qanoq ilillugit akileraarusissanerlugit iluarsiiissummik allaanerumsumik nassaarniartariaqarpugut. Inuaqatigiinnili akitsuutinik asuli qaffaassaaqataasussanik iluarsiiissutinik isumaqatigiissutinut peqataanaviangilagut. Tassa imaappoq plug-in hybridbiilinut akitsuusiissagutta inuaqatigiinni akitsuut alla naleqattaanik apparneqartariaqassaaq. Demokraatinit Naalakkersuisut kaammattorusuppugut piaarnerpaamik qamutit motorilinnut akileraarutaat eqqussuinermilu akitsuutinut pilersaarummik ataqatigiissummik nassaarniaqqullugit.

Taamatut oqaaseqarluta immikkoortut 165 166-ilu itigartippavut.